



Saothar Ealaíne Iontach a Tháirgeadh:

Beartas agus Straitéis 2018 maidir le
Féilte

Cur Síos Ginearálta agus Comhthéacs

Tá féilte ar cheann de na himeachtaí is tábhachtaí ina gcruthaítear agus ina gcuirtear na healaíona i láthair lucht féachana mór agus ilghnéitheach in Éirinn. Aithníonn an Chomhairle Ealaíon an éagsúlacht shaibhir de réimsí cleachtais foirm ealaíne a chuireann féilte i láthair agus an ról ríthábhachtach atá acu chun rochtain an phobail ar na healaíona a leathnú. Bíonn féilte lárnach go minic do phobal a chuireann a aitheantas áitiúil i láthair agus a fhiosraíonn é, chun rochtain a chur ar fáil do na healaíona i réimsí ina mbíonn an rannpháirtíocht íseal agus chun deiseanna suntasacha a chur ar fáil d’ealaíontóirí lena gcleachtas a fhorbairt. Imríonn féilte ról dinimiciúil agus straitéiseach i dtírdhreach iomlán na n-ealaíon in Éirinn, agus i réimsí níos leithne na turasóireachta cultúrtha, na forbartha pobail agus na hathghiniúna uirbí.

Tá na deiseanna uathúla a chuireann féilte ar fáil chun ealaín a léiriú agus a fheiceáil lárnach do thábhacht na bhféilte sin. Rud bunúsach i bhfoirm na féile is ea an cead chun triail a bhaint as rudaí – cead chun dul thar thairseacha a d’fhéadfadh a bheith dúnta nó toirmisceithe don chuid eile den bhliain – chomh maith leis an tsolúbthacht freagairt ar thírdhreacha uirbeacha agus tuaithe araon, agus deis chun caidreamh a dhéanamh le pobail. Mar sin, is ardán éigeantach iad féilte a thugann spás d’ealaíontóirí a bheith nuálach agus cuireadh a thabhairt do lucht féachana agus éisteachta taithe a fháil ar a n-obair ar bhealaí difriúla.

Is é ról na Comhairle Ealaíon tacú le timpeallacht féilte ealaíon ilghnéitheacha agus éagsúla agus chun slabhra tacaíochtaí maoinithe a chur ar fáil a spreagann samhailtí a bhfuil suntasacht náisiúnta agus idirnáisiúnta leo agus an cleachtas is fearr, i.e. samhailtí a mhéadaíonn deiseanna do chaidreamh leis an bpobal nó do rannpháirtíocht an phobail nó a fhorbraíonn saothar ealaíontóra/foirm ealaíne. Ina theannta sin, cuireann an Chomhairle Ealaíon tacaíocht ar fáil d’fhéilte beaga chun taithe ar ealaíona ardcháilíochta a thabhairt do lucht féachana agus éisteachta. Tugtar tosaíocht freisin do chlár a chruthaíonn rannpháirtíocht phobail áitiúla agus atá ábhartha dóibh.

Sainaitníonn an Chomhairle Ealaíon dhá réimse tosaíochta beartais in [Saothar Ealaíne Iontach a Tháirgeadh an t-ealaíontóir](#) agus [rannpháirtíocht an phobail](#). Agus na réimsí tosaíochta sin a chur ar fáil i bhféilte, glacfaidh an Chomhairle an cur chuige seo a leanas sna trí bliana seo romhainn.

Ealaíontóirí agus Féilte

Tugann an Chomhairle Ealaíon tacaíocht indíreach d’ealaíontóirí trí mhaoiniú a chur ar fáil do raon leathan samhlacha féile chun bonneagar féile éagsúil agus láidir a chruthú inar féidir le healaíontóirí leas a bhaint as deiseanna coimisiúnaithe, chur i láthair agus comhléirithe, saothar nua a chur chun cinn agus a thástáil, agus dul i gcion ar lucht féachana nua.

Go háirithe, tá féilte chun tosaigh ó thaobh ealaín sráide agus seónna a chur chun cinn in Éirinn, agus iad lárnach dá fás agus dá forbairt leanúnach; agus chun timpeallacht riachtanach a sholáthar d’ealaíontóirí sráide agus seónna chun saothar a thástáil, a chothú agus a chur i láthair lucht féachana.

Aithníonn an Chomhairle Ealaíon féilte mar rudaí a chuireann timpeallacht ar fáil le haghaidh rioscaí cruthaitheacha a ghlacadh, breithmheas dírithe agus léirmheastach a dhéanamh ar shaothar, agus meantóireacht agus teagmháil le saothar clúiteach go náisiúnta agus go hidirnáisiúnta, ar féidir leo ar fad cuidiú le forbairt scileanna gairmiúla ealaíontóirí.

Trína [Maoiniú Straitéiseach](#), tacaíonn an Chomhairle Ealaíon leis an mbonneagar riachtanach a theastaíonn chun cleachtas féilte a chothú agus a fhorbairt in Éirinn. Leathnaítear é sin amach thar raon réimsí cleachtais foirmeacha ealaíne. Tacaíonn [Maoiniú Deontais do na hEalaíona](#) le forbairt chláir féilte. Chuige sin is mór ag an gComhairle Ealaíon ní hamháin forbairt cleachtais foirmeacha ealaíne aonair ach freisin an cur chuige maidir le samhlacha de na healaíona ildisciplíneacha i bhféilte. Trína clár [Gairmeacha Oscailte](#) tacaíonn an Chomhairle Ealaíon le mórthionscadail uailmhianacha nua agus cuireann timpeallacht ar fáil le haghaidh rioscaí cruthaitheacha a ghlacadh i gcomhthéacs féile.

Agus í ag tabhairt breis tacaíochta d'ealaíontóirí, déanfaidh an Chomhairle Ealaíon na nithe seo a leanas as seo go ceann trí bliana:

- Forbróidh sí treoirscéim dreasaithe d'fhéilte d'fhonn scéimeanna cónaitheachta ealaíonta a óstáil ar fud na tíre.
- Spreagfaidh sí féilte trí [Scéim Infheistíochta na bhFéilte](#) chun tuilleadh deiseanna a thabhairt d'ealaíontóirí áitiúla.
- Tabharfaidh sí tacaíocht mhéadaithe d'ealaín shráide agus seónna.
- Déanfaimid forbairt bhreise ar ár dtuiscint féin ar chleachtas ealaíon ildisciplíneach agus a thionchar ar chruthú féilte.

Rannpháirtíocht an Phobail agus Féilte

Tá ról suntasach ag féilte (mar gheall go minic ar an úsáid a bhaineann siad as spás poiblí agus cineálacha rannpháirtíochta) maidir le heispéiris nua ealaíonta a sholáthar don phobal. Aithníonn an Chomhairle Ealaíon an tábhacht atá leis an soláthar sin, agus tuigeann sí gur bealach a bhíonn sna féilte go minic chun gníomhaíocht ealaíon a chur os comhair an phobail den chéad uair. Ó thaobh rannpháirtíocht an phobail de, fáiltíonn an Chomhairle Ealaíon roimh chuir chuige éagsúla trí fhás agus forbairt an lucht féachana, agus trí dheiseanna a chruthú don phobal a bheith ag gabháil do na healaíona mar rannpháirtithe, mar chomhoibrithe ealaíonta agus mar oibrithe deonacha. Chuige sin beidh meas ag an gComhairle Ealaíon agus tabharfaidh sí cosaint don chúnamh a gheofar ó rannpháirtíocht amaitéarach agus dheonach i gcleachtas féilte.

Sa réimse rannpháirtíocht an phobail, cuirtear spéis na Comhairle Ealaíon in iúl trí bheartas féilte i dtrí réimse: lucht féachana, rannpháirtíocht agus obair dheonach.

LUCHT FÉACHANA/ÉISTEACHTA

Níl ach tuiscint theoranta ar iompar, treocheartaí agus tagarmharcáil lucht féachana féilte. Dá dtomhaisfí a leithéid de ghníomhaíocht thabharfaí faisnéis d'fhéilte a bheadh áisiúil chun straitéisí cruinne agus iomchuí a fhorbairt chun an lucht féachana a fhorbairt.

RANNPHÁIRTÍOCHT

Tá deis ag féilte tógáil ar a gcumas rannpháirtíocht an phobail a mhéadú agus samhlaíocht difriúla a fhorbairt agus cuir chuige níos dinimiciúla maidir le rannpháirtíocht an phobail, lena n-áirítear cleachtais ealaíon rannpháirteacha agus comhoibríochta agus cinn atá rannpháirteach go sóisialta.

OBAIR DHEONACH

Tá teorainn leis an tomhas agus an tagarmharcáil atáthar a dhéanamh ar acmhainní féilte i láthair na huairé agus bhainfidís tairbhe as imscrúdú breise chun leochaileacht/seasmhacht fhéideartha na hearnála a mheas agus buntáistí a caipitil shóisialta. Chuideodh infheistíocht san earnáil dheonach chun timpeallacht féilte a choimeád ag imeacht in Éirinn.

Leis an tacaíocht a thugtar d'fhéilte trí [Maoiniú Straitéiseach](#) agus cláir [Maoiniú Deontais do na hEalaíona](#) na Comhairle Ealaíon tá deis ann forbairt a dhéanamh ar raon leathan lucht féachana i gcomhair na n-ealaíon. Leis an tacaíocht a thugann an Chomhairle Ealaíon d'fhéilte beaga trí [Scéim Infheistíochta na bhFéilte](#) bítear in ann rannpháirtíocht níos mó a chruthú sna healaíona. Le chéile, tugann an tsraith tacaíochtaí maoinithe lear mór deiseanna saibhre agus éagsúla don phobal an soláthar ealaíon a rochtain. Tríd an obair a dhéanann na heagraíochtaí sin tugtar rochtain don phobal ar raon éagsúil gníomhaíochta ealaíon nach mbeadh ar fáil dó murach sin.

Agus rannpháirtíocht an phobail á forbairt tuilleadh, déanfaidh an Chomhairle Ealaíon na rudaí seo a leanas as seo go ceann trí bliana:

- Beidh sí meáite do staidéar tagarmharcála, treocheartaí agus iompraíochtaí atá sonracha do lucht féachana a dhéanamh.
- Tabharfaidh sí isteach tosaíochtaí féile a ghabhann le Scéim Infheistíochta na bhFéilte a neartaíonn an riachtanas maidir le rannpháirtíocht níos mó ón bpobal agus samhlaíocht difriúla cleachtais.
- Cuirfidh sí staidéar i gcrích ar shochair chomhchineáil agus ar obair dheonach chun tuiscint níos fearr a fháil ar bhonneagar féilte agus an úsáid a bhaintear as caipiteal sóisialta.
- Déanfaidh sí fiosrú, leis an bhfoireann Rannpháirtíocht sna hEalaíona ag an gComhairle Ealaíon agus le gníomhaireachtaí seachtracha ar shamhlaíocht dea-chleachtais de rannpháirtíocht an phobail agus cleachtais ealaíon rannpháirteacha agus chomhoibríochta agus ar an tslí atá siad sin ábhartha d'fhorbairt earnáil na bhféilte.
- Forbróidh sí tacaíochtaí a chuireann le cumas na hoibre deonaí agus beidh sí tiomanta dea-chleachtas a fheidhmiú sa réimse seo.

Réimsí Forbartha atá Sonrach d'Fhéilte

Bíonn tionchar ag raon saincheisteanna eile a bhfuil ábharthacht straitéiseach ar leith acu d'fhéilte ar an réimse d'ealaíontóirí agus lucht féachana i gcoitinne.

Sainithnítear i dtorthaí ón Athbhreithniú ar Scéim na bhFéilte agus na nImeachtaí in 2017 go bhfuil easnaimh sa leagan amach maoinithe agus sna tacaíochtaí acmhainní atá ann d'fhéilte i láthair na huaire. In ainneoin an teacht aniar suntasach ó thaobh gnéithe eagraíochtúla atá i bhféilte beaga, tá deis ag na féilte sin cur lena gcumas. Chuige sin, an rud is fearr don Chomhairle Ealaíon a dhéanamh ná infheistíocht airgeadais a mhéadú agus eolas agus roinnt scileanna a chur chun cinn.

Chun dul i ngleic leis sin, déanfaidh an Chomhairle Ealaíon na rudaí seo a leanas as seo go ceann trí bliana:

- Cinnteoidh sí go bhfuil sásra maoinithe ann atá oiriúnach d'fhéilte a mheaitseálann na céimeanna difriúla dá bhforbairt.
- Tabharfaidh sí deiseanna d'eagraíochtaí tacaíochtaí eile a ghiaíil chun cúnamh a thabhairt agus cumas a thógáil i sainréimsí beartais.
- Déanfaidh sí iniúchadh ar chur chuige ilghníomhaireachta a leagan síos chun cabhrú le féilte a gcuid scileanna a thógáil agus a gcleachtas a fheabhsú.
- Déanfaidh sí coimisiúnú agus forbairt ar fhoireann uirlisí chun cuir chuige dea-chleachtas, treoir agus tacaíochtaí praiticiúla a sholáthar.
- Méadóidh sí a tiomantas airgeadais d'fhéilte beaga agus spreagfaidh sí a bhforbairt straitéiseach.

Réimsí Eile as *Saothar Ealaíne Iontach a Tháirgeadh* ina bhfuil Leas Straitéiseach ag Féilte

Sa réimse a bhaineann le spás agus déimeagrafaic, déanfaidh an Chomhairle Ealaíon na rudaí seo a leanas as seo go ceann trí bliana:

- Infheisteoidh sí i mbreis anailís geospásúil ar na féilte sin a fhaigheann tacaíocht airgeadais.
- Lorgóidh sí comhaontú (nuair is cuí) idir an Chomhairle Ealaíon agus údaráis áitiúla maidir le spriocanna sonracha i ndáil le forbairt straitéiseach féilte.
- Forbróidh sí, trína [Scéim Infheistíochta na bhFéilte](#) sásra chun tosaíocht a thabhairt d'ealaíona na bhféilte a chuirtear ar siúl in áiteanna geografacha a bhfuil beagán rannpháirtíochta leis na healaíona iontu.

Sa réimse a bhaineann le daoine óga, leanaí agus oideachas, déanfaidh an Chomhairle Ealaíon na rudaí seo a leanas as seo go ceann trí bliana:

- Déanfaidh sí fiosrú, i gcomhar leis an bhfoireann DÓLO ag an gComhairle Ealaíon agus le gníomhaireachtaí tríú páirtí, ar mhodhanna dea-chleachtas chun deiseanna do dhaoine óga a bheith rannpháirteach i gclár féilte a mhéadú agus a fheabhsú.

- Cumasóidh sí taighde tagarmharcála ar thaithí daoine óga ar chlár féilte.

Sa réimse idirnáisiúnta, déanfaidh an Chomhairle Ealaíon na rudaí seo a leanas as seo go ceann trí bliana:

- Tabharfaidh sí tacaíochtaí isteach chun deis a thabhairt do lucht eagraithe féilte cuairt a thabhairt ar shaothar idirnáisiúnta agus breathnú orthu, agus foghlaim ó na malairtí tuairimí sin mar chuid de sholáthar níos leithne de thógáil cumais féilte.